



宛季餘編

四部稿百六十四至百六十六

四

1冊4
600
211



600
211

文華閣藏書

弁州山人四部稿卷之一百六十四

龍澤文庫

吳郡王世貞元美著

說部

皇清文庫

宛委餘編九

乾坤鑿度載太古百皇闢基文縮氏有巢氏遠理徵

萌始有熊氏即庖犧亦名蒼牙繼老神氏天英氏天老氏混沌

氏天英氏無懷氏炎帝神農氏烈山氏帝皞氏老孫

氏公孫軒轅氏

二墳載太古之人皆壽盈易始三男三女以女生為

姓始三頭謂之合雄紀生子三世合雄氏沒子孫相

傳記其壽命謂之敘命記通紀四姓生子二世男女
衆多羣多連連是謂連連紀生子一世通紀一姓是
謂五姓紀男女衆多分爲九頭各有居方故號居方
氏生子三十二世強弱相迫中有神人提提而治故
號提提氏生子三十五世通紀七十二姓故號通姓
氏有巢氏教人居巢穴積鳥獸肉聚草木實燧人氏
教人庖食俱通姓氏後壽俱一太易伏羲氏燧人子
也風姓號天皇太昊伏羲有庖升龍氏已前山墳連
山易也人皇神農氏氣墳歸藏易也地皇軒轅氏形
墳乾坤易也已上二則辭多穿鑿附會姑記以俟考

○帝王世紀載有巢氏一曰大巢氏燧人氏太昊庖
犧氏一曰伏羲蛇身人首女媧氏與伏羲氏俱蛇身
人首一號希是爲女皇皆風姓大庭氏柏皇氏中央
氏卷須氏要陸氏驪連氏赫胥氏尊盧氏混沌氏昊
英氏有巢氏朱襄氏葛天氏陰康氏無懷氏凡十五
氏皆世襲庖犧號按此則有巢氏在後矣

炎帝神農氏至榆罔凡八世合五百三十年
帝王之貌如伏羲女媧蛇身人首神農人身牛首戴
玉英玉勝黃帝龍顏顙項首戴干戈帝嚳駢齒帝堯
鳥庭荷勝眉有八采豐下銳上帝堯舜色龍顏重瞳

解擇舜字
上竟及色恐
衍

大口手握襃禹虎鼻大口兩耳三漏首戴鈎鈐曾有三
玉斗足文履吉又云長頸鳥喙湯豐下銳上珠庭骨
而有鬣倨身而揚聲臂有四肘文王龍顏虎肩曾有三
四乳武王駢齒秦始皇蜂準長目鷲鳥膺豺聲漢高
祖隆準龍顏美鬚鬣左股有七十二黑子光武隆準
日角大口美鬚眉照烈臂垂過膝頤見其耳晉武帝
炎髮委地手過膝齊太祖道成龍頰鐘聲鱗文偏體
梁武帝衍兩髀駢骨頂上隆起有文在左右手曰武
陳武帝霸先日角龍顏垂手過膝齊神武歡目有精
光長頭高額齒白於玉文宣帝洋鱗身重蹠周文帝

泰方頰廣額美鬚鬣髮長委地垂手過膝背有黑子
宛轉若龍盤之形隋高祖龍顏長上短下額有五柱
入頂目光外射有文在手曰王唐太宗龍鳳之姿天
日之表宋太祖正黑色方面大耳

其間位方隅者項羽目重瞳子力能扛鼎噉鳴叱訖
千人皆廢王莽侈口露眼赤睛大聲而嘶反膺高視
瞰臨左右孫權紫髯方頤大口長上短下劉淵子聰
俱猿臂淵鬚長三尺餘當心有赤毫毛三根長三尺
六寸聰左耳毫長二尺非常光澤劉聰生而眉白鬚
四尺餘慕容皝龍顏版齒慕容手垂過膝符堅背有

赤文隱起成字曰卅付臣又土王臂垂過膝面有紫
光慕容德額有日角偃月圭文魏什翼捷隆準龍顏
立髮委地臥則乳垂至席

自古創業之君俱不利長子高辛氏顓頊長子帝摯
不善崩弟堯代立陶唐氏帝堯長子丹朱不得立立
舜有虞氏帝舜長子不得立立禹湯長子太丁妹立
而卒周太王長子泰伯文王長子伯邑考一肇王跡
一剪商者也泰伯伯邑考皆不得立秦始皇長子扶
蘇不得立立胡亥漢高帝長子惠帝立而絕文帝繼
王光武長子東海王不得立立明帝魏武長子曹昂

解云從字下
有脫字

戰沒立文帝孫堅長子策無後立權孫權長子和不
得立立休司馬懿長子師無子立司馬昭宋武長子
義符廢立文帝劉淵長子和廢四子聰代劉曜長子
胤前沒虜止為王符健長子廢立次子代石勒子弘
為虎廢石虎長子邃宣俱前廢慕容儁前子死次子
暉立慕容垂長子令被殺次子寶立齊蕭太祖長子
武帝立一世而絕從子繼之梁武帝長子昭明早逝
次子簡文帝陳武帝長子死於江從子濤立北齊神
武長子澄弒次子洋立周文長子安定公立而廢少
子武帝立隋高祖長子勇廢次子煬帝立唐高祖長

子建成，僂次子太宗朱梁太祖晃，長子友文墜馬死，少子友貞立。後唐太祖克用，長子落落陣亡，少子存勗立。明帝長子從榮僂從厚立。吳王揚行密，長子渥廢。次子隆演立。南唐徐溫，長子知訓以亂死，養子知誥立。蜀主王建，長子元膺僂次子衍立。南漢劉隱，閩王潮子，俱不立。立弟後蜀孟知祥，公主子在唐不得立。立景宋太祖長子德昭自殺，弟太宗立。太宗亦自作創始，長子元佐不得立。立真宗契丹阿保機子東丹王不得立。立次子德光。金阿骨打子蒲盧虎不得立。立弟吳乞買。元太祖長子先沒，立次子憲宗。世祖長

子真金與我

高皇懿文太子俱先歿，然則由古及今，創業之主，其為嫡長子而得傳位及後人者，僅禹子啟也，亦異矣。○尚書令本執政官，至隋而重大業初，僅楊素一人。武德中冊拜太宗後絕不復設。代宗朝加郭子儀固辭，不敢當。後邠寧帥王行瑜欲得之，以子儀例不予。加尚父太師，賜鐵券，然自是行瑜及李茂貞錢鏐王鎔馬殷高季興錢元瓘錢徽得為之，皆藩鎮也。楚王元佐鎮王元偓周王元儼皆宗室也。大臣贈者以無兼官為重。若趙韓王韓魏王是也。

天策上將亦唐高特設以褒太宗者後加楚王馬殷
馬希範皆開府如故事宋真宗加楚王元佐則虛稱
也如周王元儼輩用以贈官北齊有贈假黃鉞至宋
贈入朝不趨劍履上殿尤無謂

古官名有極賤而極貴者僕射有極貴而極賤者太
師樂官之長也以文名武者漢昭文將軍儒林校尉以武
名文者唐有武學博士今名有俗而官則雅者庶子
洗馬名有武而官則文者兵馬指揮名有文而官則
武者留守大而小者大使小而大者副使名與實不
相蒙者祭酒古貴而今賤者宜撫招討巡檢古賤而

今貴者侍郎漢趙后通

偶見有辭上柱國者以為人臣無上不知此官始在
楚為勳官在令尹下諸卿上階為從一品階官在唐
則為四品以上階官不足道也古今官名有非人臣
所宜稱者總百揆舜禹以後司馬昭炎桓玄劉裕蕭
朱全忠俱為之宰衡漢王莽晉天柱大將軍魏爾朱
蓋即真之漸也爾朱兆高魏胡無上王魏莊帝兄宇宙大
將軍都督六合諸軍事梁侯天地太師成范尚父
公望漢董卓唐郭子儀李回天再造功臣朱全皇天
輔國王行瑜五代錢鏐安國相王睿鎮國大長公主
宗

之下一人之上元帝

妹太平
公主

相國丞相皆秦官兼政者太師太傅太保古三公後
以為三師位上公以太尉司徒司空為三公故也相
國自召不韋蕭曹後罷不設至司馬昭父子以此慕
魏後遂因之東漢有三公而無丞相曹操父子以此
慕漢亦遂少置渡江之後惟王導會稽王昱以序遷
者三師惟太師為尊魏避司馬師諱改為太宰高齊
立置而以太宰位太師上左右承相位太宰上然董
卓以相國遷太師孔光以丞相宇文泰以大丞相遷
太師太冢宰則又以太師為尊也元帥即漢太尉晉

丞

丞

都督中外諸軍職也金為都元帥權甚重而位在三
公丞相下元則至輕僅若今之指揮使耳至加以天
下為稱則亦非人臣所宜當也

相國魏司馬昭司馬炎晉司馬倫桓玄劉裕宋蕭道
成齊蕭衍梁侯景陳霸先偽漢劉粲劉曜偽趙石虎
石琨魏高洋後周楊堅唐朱全忠皆不久而成禪代
者也

大丞相魏爾朱榮高歡宇文泰後周楊堅隋李淵契
丹趙延壽韓德讓元伯顏
天下兵馬元帥唐肅宗代宗德宗皆以皇太子領

之朱全忠以梁王領之肅宗為大元帥五代時錢鏐
錢俶以吳越王領都元帥北魏初加爾朱榮柱國大
將軍位承相上後遂加天柱若徽稱然宇文泰在西
魏與七功臣為八柱國加者漸多至隋乃以上柱國
為崇加而柱國次之唐時上柱國品遂下至第四
明興始復正之以上柱國為正一品勳柱國為從一
品勳

漢列侯不與政而勳重者位特進後以大將軍鄧騭
辭位加同三司之儀以後得開府辟僚屬又與三公
俱開黃閣故曰開府儀同三司羊征南位開府謙讓

不肯辟召是也魏晉之際太保王祥以睢陵公太保
衛瓘以蘭陵公司徒魏舒以劇陽子老就第太保同
保傅司徒同三司亦此意但不入官耳晉宋齊梁陳
俱不輕受北魏爾朱世隆辭太保加同三師在三公
上後周及隋改為勳官在柱國下有三等曰上開府
曰開府曰儀同至唐而始復故文皇之世唯尉遲敬
德辭都督乃得加之位次房司空以後復為階官之
最其次特進國初亦因之然官至太尉司徒司空而
曰儀同三司名實抑何舛也國初去開府儀同以待
進光祿大夫冠正一品是矣然以公卿而稱大夫如

尚書再滿考階曰資德大夫勳曰正治上卿其勳階亦自相矛盾不可不改正也予嘗戲謂官至卿而稱大夫者尚書左右都御史也官止大夫而得稱卿者太常至尚寶也

左傳趙簡子伐衛誓師曰克敵者上大夫受縣下大夫受郡杜氏註曰千里百縣縣有四郡當是時縣蓋統郡也按堯分天下為九州舜益以十二州禹復為九州其所統者五等之國耳自諸侯兼并地日益以大而始有郡縣之名秦孝公命商鞅分秦地為四十一縣後并天下罷侯置守凡三十六郡而郡始改而

統縣矣漢氏因之而兼有王國侯國武帝始復以十三州統郡國後設刺史權尊而秩卑若今之巡按御史至後魏末而刺史握兵益重遂為州牧三國晉氏往往復設將軍督軍而州有不領郡者郡亦有不屬州者隋煬帝悉改州為郡諸邑屬焉其大抵因秦之舊唐復以郡為州而開元天寶之際又以兵興設節度使統之其不建節者為觀察而亦有畿內如同華江左如蘇常不屬藩鎮者宋興藩鎮為虛銜而實則以州領縣其得稱為府者或以建之行都如魏州興唐或以天子藩封建節如宋州歸德府之類蓋小則

為州為軍大則為府自故相以及曹郎皆得次第任
之重者判輕者知而南渡之後又設招討制置安撫
以彈壓之上而宣撫尚得兼領州府蓋又隱然唐舊
矣元始以府領州縣府之大者為路縣之大者為州
而州又有領縣者又為行省以分轄之軍事兼屬焉
兵興之際或設行樞密院事定則否大省則有行御
史臺小者有肅政廉訪使

國朝因之罷路悉為府後降行省為布政司行樞密
院為都指揮司行臺廉訪總名之曰按察司以綱維
郡縣後以遠不相及復設守巡兵備分理之又以三

司不相聯屬歲命御史稽察之巡撫都御史以督攝
之而府體益卑矣今之異於古者州屬府府之上為
監司監司之上為臺察而又有小未安者既云州而
又云府名所當改定也元以行中書省故名各省今
兩畿曰南北直隸則各省當云某司隸可也

秦雖廢封建而功臣亦有一二封侯者見於嶧山之
梁諸碑可攷凡列侯倫侯二等如王離王賁之類列
於右丞相去疾上自漢以列侯為丞相武帝以丞相
封侯至霍光廢昌邑王之奏而御史大夫誼列於四
嗣侯上矣然九卿猶在下也自後有子侯有小侯職

日就卑而章服猶如故按漢有王侯而無公其封王者不以一字二字分等第至曹操封魏公進封王而後禪代之主皆取法矣

魏末定五等封郡公縣公郡侯縣侯伯子男開國者皆金印紫綬關內侯在子男下猶金紫至關外侯則銀青矣皆世襲晉及六朝因之自郡公而上開國則易姓之漸也

元魏及北齊不愛王爵而有功則別封郡公侯至有帶三四爵者然同姓異姓皆不得封國王而郡縣公侯益卑矣後周宇文泰辭安定王遂為安定公終身

而其子嗣位進封功臣為晉趙燕宋等國公而無郡王隋氏因之然郡縣公侯而下益多且賤不足計也唐以天子子弟封一字王稍疎而有功者如淮南趙郡江夏王之類文武功臣如趙國公無忌梁國公房玄齡之類皆得世襲蓋自周而至唐異姓不王矣然國公郡王皆從一位也後至玄宗封安祿山為東平郡王以後王爵遂輕而兵馬押牙亦有封王者矣然文臣不王如故也天寶以後王公亦不得世襲而末年藩鎮強威逼帝室以王公不足重而朱全忠李茂貞李克用皆真王矣宋興復承唐之舊而親王郡王

以宗室敘封公侯伯以文武臣第加不以功而以資然異姓猶不得王室徽宗舉以封童貫而南渡後張韓遂因之秦檜韓侂胄以執政封矣元承遼金之後王爵尤易真王卽將相可得之明興始定爲之天子之子弟封親王親王之子弟爲郡王皆自天子而下近於君者也開國公得贈王自侯而伯皆在正品上雖師傅之尊班不得立矣蓋略採漢氏之意嘉詳雖襲唐宋之名而加貴者也

古之封戶有極異者漢以城邑封侯初自二百餘戶至萬戶其一邑之徭賦悉予之子孫能休養生息者或數倍於初高齊以後封爵侈而戶口不繼於是別立真食之數大槩十之一二耳封祿止是調絹量戶而計然皆不入御也至宋則止食本官之祿而戶封實封皆以入銜爲美觀而已歷代官制無如宋氏猥雜甚至勳階銜位十餘條不知實職所在元豐稍有次序亦未盡善

設官慕古而不經者無如新舊其次宇文周舊以掌衝安漢公攝帝以王舜爲太傅左輔甄豐爲太阿右拂甄邯爲太保後承卽真後封子安新嘉辟諸孫爲功隆功明等公以舜爲太師封安新公平晏太傅就

新公少阿羲和劉歆國師嘉新公布衣哀章國將美
新公為四輔位上公甄邯大司馬王尋大司徒王邑
大司空為三公甄豐更始將軍布衣王興衛將軍孫
建立國將軍布衣王盛前將軍俱封承新章新等公
凡十一公又倣堯典四星四嶽以命四輔月刑日德
斗平以命三公更大司農曰羲和又曰納言大理曰
作士用作字太常曰秩宗大鴻臚曰典樂少府曰共
工水衡都尉曰予虞用予字光祿勳曰司中太僕曰
太御衛尉曰大衛執金吾曰奮武中尉曰軍正又置
主乘輿服御官曰大贅皆上卿郡太守曰大尹都尉

曰大尉令縣長曰宰御史曰執法公車司馬曰王足
又有五侯將帥左伯右伯東通靈將五司大夫太子
有師疑傅丞阿輔保拂胥附犇走先後禦侮又有師
友祭酒俱秩上卿又置卒正連率大尹職如太守屬
令屬長職如都尉置州牧部監二十五人見禮如三公
公監位上大夫各主五郡公作牧侯作卒正伯連帥
子屬令男屬長皆世有官無爵者為尹分長安城旁
六鄉置帥各一人分三輔為六尉部河東河內弘農
河南潁川南陽為六隊帥置大夫職如太守屬正職
如都尉更名河南大尹曰保忠信卿緣邊又置竟尉

以男為之。宇文氏建六官，其小冢宰以下至大夫。上士一依周制而不能正其職也。天元增設大前疑大後丞大左輔大右弼。後楊堅執政，復有左右大丞相二公六官，併疑丞而下，凡十五公矣。

先為道士仕宦者，唐侍中魏徵、丞相盧程先仕宦後為道士者，唐禮部侍郎賀知章、又河南參軍鄭銑、朱陽丞郭僊舟以獻詩能官度為道士。

先為僧而蓄髮仕宦者，宋湯惠休、唐賈島、蔡京先仕宦而削髮為僧者，南齊劉勰、梁劉之遴、張纘、宋饒德操皆名士也。魏即著文心雕龍者，法名慧地，一年而

卒，纘為執政，方岳之遴官禁秘，以侯景亂削髮，尋皆為相。東王所醜死，又北魏元太興以西河王衛尉卿削髮名僧懿。

為僧為道而舉進士者，唐劉軻前後仕宦而中為道人者，梁伏挺為行者，唐徐安貞、挺安貞皆以居官有罪懼發故也。

由僧徑拜大位者，唐左衛大將軍梁國公懷義、元太保參議中書省劉秉忠、明太子少師姚廣孝、懷義驥倖不足言，秉忠廣孝皆名臣，廣孝不蓄髮不婚娶。

由道士徑拜大位者，唐嵩山于什方為正諫大夫，同

中書門下平章事葉靜能為國子祭酒鄭普思為秘書監尹愔為諫議大夫仍以道士服治事明邵元吉為禮部尚書陶仲文為少師恭誠伯

有內職而移為將相者中書令樞密使漢官兼內外人者將行即大長秋有內臣而真為宰相者秦丞相

趙高魏太師太司馬都督中外諸軍錄尚書馮翊王宗愛唐尚父司空中書令博陸王李輔國南漢太師

內樞密使龔托宋太師領樞密院事廣陽王童貫少保梁師成元太司徒領中書左丞相李邦寧有儒臣

而入為內臣者太史公司馬遷為中書令有內臣而

出領儒臣者內侍監魚朝恩兼判國子祭酒南漢至狀元及第及雅士名儒俱先下蠶室而後得入用事抑何不幸也

欒巴初以天闥為中黃門後陽道開通自言出列御

郡張平養子通於平妾因自割其勢後事符堅至大將封侯號萬人敵史不載其割勢事見十六國春秋

楊素弟約少為查所傷遂成宦者後為內史令封郡公而無子樊叔略長九尺被腐為高氏給使殿省走

周累典大郡封清鄉縣公謚曰襄見循吏傳女子改國號稱帝者女媧氏周武氏稱制者漢呂后

女子封侯者女列侯陰安侯漢高祖丘嫂鳴雌亭侯
許負魯侯底氏子奚涓死事無子母封十九年薨已
上高祖封臨光侯呂嬃高后封鄼侯蕭何子嗣侯祿
薨高后封何夫人为鄼侯

女子为女官者女侍中後魏元义妻胡氏齊高岳母
山氏趙彥深母傅氏南漢盧瓊僊女尚書魏明帝選
知書女子为之女學士唐德宗朝貝州宋氏五女若
萃若昭若華若倫若憲陳後主時宮人袁大捨笄女
博士宋孝武朝韓蘭英

女子为男官者女將軍晉王廙起兵願深母孔氏年

為下恐有
脫字

百餘以为軍司馬廙復以已女为貞烈將軍唐行營
節度許叔冀以衛州女子侯氏滑州女氏唐氏青州
女子王氏軟血赴義奏授为果毅陳女白頸鷗为契

好當作婦

丹懷化將軍侍夫數十人
女子執國政者齊陸太姬司綸綽者唐上官婕妤司
史事者漢曹大家主兵者唐平陽公主洗夫人

女子詐为男子而有官位者齊揚州議曹錄事姜暹
唐昭義軍兵馬使國子祭酒石氏朔方兵馬使御史
大夫孟氏蜀司戶參軍黃崇嘏楊升菴詩話又有女
校書薛濤女進士林妙玉濤乃稱謂之詞妙玉宋女

童應試封孺人

封爵有故加以惡名者頡羨侯劉信一本曰曰羨憂
侯高帝微時過信其母憂金以邵帝故也不義侯子
密蒼頭子密弑其主彭祖故也悖義將軍佞濁子符
承祖元魏倖臣以罪斥故也違命侯李煜宋以其不
降附故也它如宥罪歸命恩赦之類亦多以降附封
者若紂世鬼侯漢曲逆侯陳平挾術侯劉昆皆以國
邑鄉名封而不佳

漢又有劫節執節挾釐稻夷有利為氏薪館沈猷參
驪栗節洩夷抑裴蘭旗蒲領手慕即來麗茲擗項橐

祖汁防汁音什防音方闕氏汜陵南鄭陸量土軍者

秦下摩輝渠濕陰河綦眾利潦嫫南奔發干○鱣○

蕢○餅○獠○印○鹵○梧○軼○瞭○芒○既非

郡邑而字義頗不明了疑即鄉亭名也

魏武有發丘中郎將摸金校尉見陳琳檄宋廢帝復

設此官漢西域有僮僕校尉

謚法白虎通卿大夫有爵故有謚士無爵故無謚春

秋之世周齊晉衛君及卿有謚大夫無謚若羊舌肸

祈奚遠瑗之類俱無謚也魯大夫亦有謚如臧文仲

邱昭伯之類俱有謚也秦楚宋鄭卿無謚如百里奚

孟明子文孫叔華元子罕子皮子產子太叔之類俱
無諡也吳越君臣俱無諡如闔閭句踐之類俱無諡
也戰國君有諡臣無諡秦有天下君以世臣無諡漢
制列侯比於春秋有諡其無爵者不諡故西漢之世
雖嗣侯亦諡也東漢之世雖三公亦不諡也晉渡江
而後用司徒導言命公卿無爵而賢者亦予之諡無
爵而諡自東晉始也處士之有諡自符秦之於張忠
公孫永始也其有私諡也則自春秋黔婁始也婦人
從夫之諡也其別諡者則自周穆王之哀淑人始也
臣有三諡則衛侯之於公叔負惠文子也生而預諡

則衛侯之於北宮貞子拆朱成子也戰國之臣死無
諡然生而有美號者武信武安剛成諸君文信侯之
類是也春秋之世出奔而仕他國者有諡如臧武仲
中行文子之類是也崔杼纒盈身為僇矣族已滅矣
豈其故臣而為之諡抑左氏自立之也
諡法所不載者恬漢牧丘侯石慶辟周宋辟公虎相
支切虎之有角者漢廣陵侯劉裘蕩周晉國公宇文
護捷周衛侯姬某瘡周齊侯呂慈母報周天王延淵
明太子少保徐善述範漢陳文範寔私諡昌元易國武
昌公何伯祥慧北魏廣陵王元羽一唐銀青光祿大

夫司馬貞一公承禎傑金梁國傑忠公大臬齊宋尹
國孝齊公趙克脩靚周慎靚王

有諡而無釋義者疆梁光祿大夫江革尅北漢定陶

男慕容契頌唐左散騎常侍房式愷周康國公柳帶

韋夔周大右弼代王宇文達方周姑臧公令狐瑾道

遼道宗洪基興遼興宗宗真熙金熙宗亶我明熙

祖淳我明淳祖哲宋哲宗徽宋徽宗寧宋寧宗又

秦寧公明中山武寧王達制漢高遠侯丙猜蒯成侯

周滂祗漢衍侯翟山恒我明恒皇帝敷漢定侯劉

越柳侯劉罷師崇漢崇帝桓帝夏崇宗乾順慶南唐

慶宗李榮後周慶祖郭簡敢唐武都公權萬紀頌漢

臯虞侯劉顯宜梁梁都侯韋放穀漢祁侯縉賀式漢

士軍侯宜義代唐代宗勝漢河陵侯郭容衍漢邯會

侯劉仁賁漢戚侯李長申周陳侯媯犀侯于漢柳侯

劉自為安郭侯劉傳富息漢盧水侯劉爵冲漢冲帝

晉宋十四王野周大前疑越王宇文盛聞周滕王宇

文適僭周右大承相趙王宇文招專唐尚書宋應禮

初諡繻周鄭伯姬駘替梁上黃侯蕭曄脫陳西豐侯

周敷闔周太子太傅斛斯徵利周陳侯媯曜驕梁中

書令蕭子顯蔡高陽公許敬宗刻漢成安侯郭賞惑

周陳王宇文純義明高文義穀康武義茂才靜北魏
靜帝又李文靜憲略宋賈武略達元張武略弘靖初
諡釋義謀略計畫也可以證楊用脩之謬真宋真宗
周魯侯姬溥晉蘭陵世子衛恒考周王鬼魯侯姬酉
漢平昌侯王接留川王劉尚等四人玄唐玄宗明
玄皇帝博唐陳國公竇抗仁漢一皇宋元明三宗
一祖隋唐國公李昫慎周衛侯姬頽陳侯媯圉戎漢
煇渠侯應元寬梁廣信侯蕭映素宋宣德郎徐節素
積初諡濟金都國定濟公完顏謾都訶禰唐宋國蕭
貞禰公瑤智元武都智敏王孟速思

有諡忠孝者唐太原王武士釁郇國公韋陟也有諡
文貞者宋博羅主簿羅從彥也

糠今諡法不載而漢中山靖王孫昆侈嗣王薨諡曰
糠音與糠同惡諡也好樂怠政曰糠又有安陽侯劉
延被陽侯劉偃臯虞侯劉定諡亦同

天子為臣下作碑者唐太宗為魏徵高宗為李勣玄
宗為張說德宗為段秀實宋太宗為趙普仁宗為李
用和神宗為韓琦國朝

太祖為徐中山達太宗為姚恭靖廣孝
孝宗為張昌公巒而已

古有稱金貂者常侍侍中插貂以金為柱也漢稱金紫者金印紫綬也其後江左入銜曰金紫光祿銀青光祿猶此意也唐所謂金紫者紫衫金帶也又賜紫及金魚袋後元復以金紫銀青入銜國初亦因之印在秦漢以為佩服之章至六朝尚因之故至小其丞相列侯不過寸餘不以施奏牘也唐用龜魚以代印而印用之奏牘矣至明而印之寸分加大矣明之所謂綬非綬制也帶也其牙牌則以代印及龜魚也古王公列侯皆金印丞相將軍亦金印今法親王金寶一二品銀印餘皆銅印古印列侯存者多銅印人不能堯所謂按古賜印外許得自製銅木牙印蓋倣印製而為之金銀印不能存而銅獨得存故也

唐時將相告身用金花五色綾紙至宋則用織成花綾以品次有差宋勅俱草書後用三省長官僉押尚書印然無御寶當時每授官則有之至國朝考最始給與一品至五品皆誥六品以下勅花色殊異公侯一品玉軸伯及二品犀軸三品四品鍍金軸餘角軸內唯御寶加於八月之上其特使則有勅勅用小龍墨欄黃紙

弇州山人四部稿卷之一百六十四 終

弇州山人四部稿卷之一百六十五

吳郡王世貞元美著

說部

宛委餘編十

三皇本紀天皇氏兄弟十二頭也各一萬八千歲地

皇十一頭各一萬八千歲人皇九頭分長九州合一

百五十世為四萬五千六百年項峻始學篇云天皇

十三頭號曰天靈治一萬八千歲徐整三五歷記云

一人十三頭也又地皇興於熊耳龍門山人皇九頭

兄弟各三百歲分居九州此以為荒唐未敢信然至

晉宋紀各稱此騫王從古以來不死則至於今當尚在也

人壽至百歲而極彭祖七百餘歲自服僊丹後入流沙亦不言死帝王世紀神農在位百二十年黃帝少昊俱在位百年帝嚳年百五歲堯年百一十八舜年百有十禹湯年俱滿百六韜云文王祖古公壽百二十王季百歲文王九十七武王九十三周穆王五十卽位在位五十五年蓋世壽也太公年百三十六召公百八十畢公年亦百餘漢文帝時有樂人竇公者亦年百八十漢張蒼拜相封侯年百餘歲魏范明友

是苑一作范

奴二百四十歲晉范長生兩仕蜀前後百年魏羅結百七歲為外都大官百二十乃卒梁穰城人年百四十歲唯飲乳鍾離人顧思遠年百十二歲凡九娶有子十二人死亡略盡召為散騎侍郎亦至百二十而卒上津人張元始年一百十六歲膂力過人進食不異九十七始生子遂無影唐有李元爽者百三十六歲開元東封太原于伯龍一百二十八歲宋党翁百七十餘歲譙定百三十歲瓊州楊叔連百二十二父宋卿百九十五九世祖不語不食不知其年竹書紀年所載諸公之壽有可攷者顓頊三十一年

產伯鯨又四十八年而陟為高辛氏六十三年又至
堯六十一年而鯨治河年百七十二歲矣堯六十九
年而黜蓋百八十歲也桀十七年高使伊尹來朝三
十一年桀亡又十二年湯崩湯與尹年相等外丙元
年小庚五年小甲十七年雍己十二年仲壬四年太
甲元年而伊尹放太甲桐宮七年而伊尹亡距湯亡
三十餘年計尹之壽亦可百三十九矣紂三十一年西
伯得呂尚以為師年八十又二十一年而紂亡又五
年而武王陟又三十七年而成王陟康王六年而太
公薨壽一百五十二也吳地記諸樊在位十四年餘

知當作如

濟十七年餘昧二十一年僚十三年闔閭在位二十
年夫差二十三年夫差將敗之數年延州來季札救
陳去讓國之歲不下百年則三代人臣之壽未有知
四公者也然攷左傳壽夢卒襄三十一年去哀七年
實七十七年耳其三公紀年攷之正史亦未盡合然
要之在百歲外也

鄭滿長狄僑如之弟楚如簡如以宣二年攻齊衛被
殺計其時僑如當四十餘矣又一百二年而僑如死
於魯東門壽亦將百五十矣魏拓拔主稱神元帝者
百四歲高麗王康年百餘吐谷渾王夸呂即位後自

稱可汗者百年皆夷狄主也宋史日本國有大臣名紀武內者年三百七歲尤為異聞

文武以後人主眉壽之高者周穆王百五歲梁武八十六宋高宗八十一元世祖八十唐玄宗七十八唐高祖漢武帝及我

太祖俱七十一

人主享國之久者周赧王五十九年周穆王漢武帝俱五十五年周平王五十一年梁武帝四十九年周

顯王四十八年周宣王唐玄宗及我

世宗俱四十六年秦莊襄王齊景公五十九年

宋高宗在位三十一年為太上皇二十五年

即帝王位之晚者武王八十七宋高祖六十四唐明

宗六十一混一之晚者元世祖六十三

大臣老居位者伊尹太公畢召外若張蒼范長生夾

谷吾里補俱近百歲為丞相國公百餘歲卒羅結百十二

歲始以外都大官致仕衛武公九十五而為周卿士

鬻熊九十而為文王師高允九十為中書令九十八

以左光祿大夫來敏九十七以執慎將軍呂岱九十

六以大司馬李先九十五以內都大官司馬李九十九

三以太宰都督中外諸軍士燮九十三以交州牧王

張儉之下
當有年歲

盤九十二以翰林學士劉寔九十一以太尉張儉以太師夏侯勝九十以太子太傅楊統九十以光祿大夫卒張萬福八十餘以工部尚書致仕九十卒食祿七十年未嘗一日病王裕之八十八以左光祿大夫開府儀同三司王起八十八以左僕射同平章事山南西道節度使卒郭丹八十五以司徒罷郭伋八十五為華州牧明年以太中大夫卒王祥八十四以太保睢陵公致仕明年卒郭子儀八十五以尚父太尉中書令汾陽王趙燾八十四以太傅張儉八十四以衛尉卒史浩八十四以太保魏國公致仕八十九以太師卒喬行

簡八十五以少傅平章軍國重事乞祠八十六卒趙克國八十餘以後將軍營平侯罷就第八十六卒張皓八十三以廷尉罷貢禹八十二以御史大夫胡廣八十二以大傅錄尚書事卒蔡義拜丞相已八十餘董昭八十一為司徒張昭八十一為輔吳將軍公孫弘韋賢俱八十以丞相陶侃長孫嵩俱八十以太尉卒韋安石八十以左僕射始為亂兵所害太傅鄭袤食祿六十餘年其它未可悉紀

宰相秉政之久者漢蕭鄴侯何漢元年為丞相進相國至惠二年卒凡十四年張北平蒼文帝前四年為

丞相至後四年免凡十四年霍博陸光以後元二年
為大司馬大將軍兼政至地節二年卒凡二十年王
陽平鳳以竟寧元年如光官兼政至陽朔三年卒凡
十一年吳廣平漢以建武元年為大司馬豫政至二
十年卒凡二十年曹太祖操以建安三年為司空擅
政至進丞相魏王卒凡二十五年諸葛武鄉亮以章
武元年為丞相兼政至建興十一年卒凡十四年晉
王始興導以建武元年為驃騎將軍錄尚書事進司
空司徒太保丞相以咸康五年卒凡二十二年謝廬
陵安以寧康元年為僕射兼政進衛將軍太保以太
元十二年卒凡十二年劉高祖裕以義熙四年為開
府儀同三司錄尚書事擅政進太尉太傅相國宋王
至永初元凡十三年宋劉彭城義康以元嘉六年為
司徒兼政十七年以大將軍出督凡十二年魏長孫
北平嵩以天興元年為司徒輔政進大尉柱國大將
軍以太延元年卒凡四十年高神武歡以中興元年
為太師大丞相擅政天平十二年卒凡十六年宇文
太祖泰以太昌三年為丞相擅政齊王廓三年以太
師大冢宰卒凡二十三年隋高齊公頴以開皇元年
為左僕射輔政至罷凡十九年唐房梁公玄齡以貞

觀元年為右僕射輔政進司空至卒凡二十一年李
 晉公林甫以開元二十三年同中書門下三品擅政
 天寶十載以左僕射右相文部尚書死凡十九年元
 進賢載以寶應元年同中書門下平章事兼政大曆
 十二年誅凡十六年宋秦申王檜以紹興八年右僕
 射同平章事再擅政進少保太師以二十四年死凡
 十七年史衛王玠遠以嘉定元年為右丞相樞密使
 擅政進少師太師以寶慶六年卒凡二十七年
 賈魏公似道以開慶元年為少師右丞相樞密使擅
 政進太師平章軍國重事德祐元年竄凡十七年此
 皆首尾在政府者也

若霸國之相無過於管仲魏冉者管仲以桓公元年
 執齊政至卒凡四十一年魏冉以昭襄元年為將軍
 執秦政封侯至十二年為相至罷凡三十六年
 白起以昭襄十三年為大將至五十年而罷凡三十
 七年廉頗以趙孝成王十六年為大將四十年悼襄
 王元年奔魏
 凡出入將相最久者絳侯周勃從入漢為威武侯相
 國太尉再為丞相就國凡三十四年潁陰侯灌嬰為
 昌文侯御史大夫車騎將軍太尉丞相凡三十年

疾數將兵有功不當侯十二年用父食其故封高梁侯凡六十三年張北平蒼以代相封侯為計相四歲淮南相十四歲御史大夫六歲丞相十四歲比卒凡五十五年司馬宣王自撫軍大將軍受遺輔政進太尉太傅大都督凡二十三年司馬孚自司空至太宰三十年桓南郡溫自都督荊州平蜀進開府太尉太司馬都叔中外諸軍錄尚書事楊越公素以御史大夫為行軍元帥僕射尚書令司空司徒太子太師出入將相俱二十七年劉江夏義恭自都督荊州進司空司徒錄尚書太尉太保太傅領太司馬太宰三十

忠事作忠

四年長孫趙公无忠以尚書左僕射罷政為開府司空後去尚書門下省加司徒太子太師後同三品加太尉檢校中書令知門下省加太尉任公輔者三十六年李英公勣初授大將軍至左僕射司空太子太師出入將相垂五十年郭汾陽子儀以使相進司空司徒副元帥尚父太尉二十六年滿中書令二十四考裴晉公度四為同平章事三建節一留守官司司空司徒侍中中書令凡二十五年錢吳越王鏐建鎮海鎮東節加太尉太師中書令尚父天下兵馬大元帥凡四十年張齊王全義自河南尹建節加太師尚書

令天下兵馬副元帥凡四十年馬楚王殷建武安四
鎮節加太師天策上將凡三十八年趙韓王普三為
首相三建節一為西京留守左僕射太子太保少保
司空司徒侍中太保中書令凡二十九年文潞公彥
博再為首相一平章軍國一首元樞五換節領兩鎮
加侍中司空司徒太尉太師垂五十年蔡魯公京自
左僕射入凡五拜相一為司空太尉太子少師太子
太師再授太師領三省事凡二十三年史魏王浩一
為右僕射右丞相樞密使三領祠加少保少傅太保
太師凡三十二年安童二為中書右丞相一鎮北邊

垂四十年

夏侯嬰為太僕事四主二十九天子定國為廷尉十
八年

宋閩人蔡伯佈三歲應薦真宗授秘書正字歷州郡
至八十以列卿致仕食祿七十七年而無可紀孝宗
朝召嗣興四歲授右從政即皇孫榮國公伴讀後亦
無聞

佩六國相印者蘇秦五國相印者犀首六國上將者
公子無忌五國上將者項籍

漢世五為三公者胡廣四為三公者楊賜三為三公

者黃瓊楊彪唐五入相者蕭瑀裴度崔胤四入相者
常巨源姚崇常安石三入相者武承嗣武攸寧豆盧
欽望武三思李嶠李懷遠崔湜劉幽求張說張延賞
王鐸鄭畋

五季三入相者馮道

宋五入相者蔡京三入相者趙普呂蒙正呂夷簡張
士遜文彥博

昔人以馮道比胡廣蓋言其溝際行履之同也漢順
帝五年胡廣已為尚書僕射又十年而以大司農為
司徒質帝元年梁冀弑帝為太尉桓帝元年罷十月

為下恐有脫

為司空五年致仕又四年以太常為太尉又二年梁
冀誅為庶人又八年以太常為司徒又二年為孝靈

封下恐有脫

元年參錄尚書事其年宦官殺陳蕃等進太傅錄尚
書事封又四年卒凡事和順順冲桓靈六年周流四

章當作帝

公三十餘年馮道始事唐莊宗莊宗為明宗所篡事
明宗三年由端明殿學士為中書侍郎同平章事廢
章為潞王所弑事潞王以司空平章出鎮義成石晉

滅潞王四年入為司徒侍中出帝初以太尉侍中鎮
匡國契丹滅晉為太傅漢入洛為太師周篡漢以太
師為中書令瀛王凡五國十一主出入將相三公者

二十四年

馮道作長樂老敘為千古譏笑之端固也其時有竇
貞固顯唐莊宗朝為石晉學士漢司空首揆周加司
徒侍中以迄罷相至宋用前三公赴闕陪位乞以東
宮三少奉朝請不得歸洛卒年七十八自為墓志張
昭事王師範義不臣梁事唐莊宗勸張憲以死節而
身後倍之歷後唐晉漢周皆顯官以至宋祖至吏部
尚書封陳國公宋琪為契丹進士事漢周及宋拜相
兩朝王易簡舉梁進士至周顯德位太子少保宋初
加少傅三公壽俱七十九琪又作多幸老民叙易簡

構一鳴堂二品樓蓋不為長樂之見者少矣

顯頊十歲而為少昊相帝譽十五而為顯頊相唐堯
十五而為帝摯相甘羅十二而為秦上卿介子推十
五而為楚相常康成十五而為郡主簿司馬元顯高
澄俱十六開府輔政崔英十七而為符秦諫議大夫
子奇十八而為齊東阿守張緬十八為漢淮南守賈
誼十八為博士終軍二十為謁者俱有聲
安童二十一為丞相董賢二十二大司馬劉義康二
十三為司徒錄尚書事劉休仁為司徒尚書令霍去
病二十四為大司馬鄧禹為大司徒蕭子良元勰二

有脫字

十六為司徒錄尚書事安童子兀都帶亦以二十六
為大司徒字文泰二十七為丞相高岳為太尉高波
太師錄尚書事脫脫為中書右丞相王儉二十九為
僕射兼政又六年拜開府伯顏三十為中書左丞相
廉希憲三十為中書平章政事王溥三十二為平章
事范宗尹三十二為右僕射張俊三十一為元樞若
衛青之拜大將軍長孫无忌之拜僕射當亦僅三十
餘也中有宗室諸王然實兼政者聲稱者始記之
荀羨以二十九為北府中郎將監青徐諸軍事稱中
興諸將未有如其少者謝晦二十五都督荊州而有

矜色其兄瞻以荀中郎譏之晦大慙然荊州重鎮而
晦以執政出督官為衛軍三司之亞非羨比也若其
至少者齊王憲十六為益州總管霍去病十八為嫖
姚校尉出塞有功封侯塔思為行省國王破金鄧禹
二十三拜前將軍定關中大都督賀拔岳被禍僅二
十六而宇文泰代之為二十五唐洛州總管淮陽王
李道玄行軍總管郟國公羅士信各死事道玄僅十
九士信二十而盧祖尚拜光州總管杜伏威拜東南
道大行臺吳主俱二十三李世勣以黎陽來歸拜大
將軍封英公亦僅二十六然則荀羨之二十九固不

足道也

後漢以三公為真相唐以平章事為真相四代至三公者漢楊震子秉秉子賜賜子彪俱拜太尉為上公賜雖以司空終獨封侯三代三公者太尉安國亭侯袁賜子司空逢逢子太傅隗三代拜相者唐中書令河東侯張延賞左僕射同平章事魏郡公延賞中書侍郎同平章事高平侯弘靖此外雖蕭氏之八葉亦未有的傳至三世者若司馬太傅懿相國昭相國炎錢太師鏐元瓘俶皆可以稱三世三公然權政強藩非繇勛德

父子配享廟庭者唐太師西平王李晟太尉涼國公李愬宋中書令濟陽王曹彬侍中瑋尚書令魏郡王韓琦太師儀國公忠彥若父子俱為宰相或大將位望俱極隆重者商宰相衡伊尹左相陟漢丞相絳侯周勃丞相條侯亞夫吳丞相荊州牧委侯陸遜大司馬荊州牧委侯抗北齊左丞相咸陽王斛律金左丞相咸陽王光唐太尉中書令西平王李晟左僕射涼國公愬其次則韋賢玄成李邵李固袁安袁敞王龔王暢蘇瓌蘇頲韓休韓滉李吉甫德裕韓琦忠彥呂夷簡公著之類差亦可紀

宋石守信以檢校太師使相領陳州節年五十七卒
於鎮子保吉歷中外亦以檢校太師使相領陳州節
年五十七卒於鎮守信贈尚書令保吉贈中書令可
稱奇事

父子同時在大位若為三公者漢右將軍上官桀驃
騎將軍安公從大司馬大將軍霍光右將軍禹大將軍
耿況大將軍弇相國司馬昭開府儀同三司炎從公晉
太宰司馬孚大司馬望太傅司馬導子開府儀同三
司元顯宋太傅蕭道成開府儀同三司躋魏太師馮
熙司徒誕太師元繼開府儀同三司又太師大丞相

高歡大將軍澄北齊左丞相斛律金太保光後唐中
書令趙德鈞侍中延壽同公吳太尉徐知誥司徒景
通宋太師尚書令錢俶檢校太師侍中惟濬太師蔡
京太保攸太師秦檜少師燾元大師月赤察兒太保
塔刺海少子太師瓜頭與父同太保馬札兒台右丞
相脫脫

父子對秉機政者晉王渾為尚書左僕射濟為侍中
治門下省吳紀亮為尚書令子隲為中書令導子元
顯俱為錄尚書事時稱東錄西錄蔡京領三省事秦
檜為尚書左僕射馬札兒台為中書右丞相攸燾脫

脫俱知樞密院事

父居大藩而子秉政者高歡以大丞相行臺晉陽澄以中書監京畿大都督秉政徐溫鎮金陵知訓知誥先後秉政趙德鈞鎮盧龍延壽以樞密使秉政月赤察兒為行省右丞相鎮和林而塔刺海伽頭相繼以中書右丞相秉政

父子同建節者郭汾陽朔方子晞邠寧行營節宣武韓弘河陽公度魏博田弘正河陽布盧龍趙德鈞忠武延壽延壽為隨駕行營都部署而德鈞為東北面行營都統淮南錢俶山南東道惟濬其他若錢鏐之於禩瓘馬殷之於希聲建節於父國者不論也

父子同時封王公侯者自宗室外昌黎王馮熙南平王誕魯國公蔡京燕國公攸益國公秦檜嘉國公熺各自以恩澤封義陽王陸侯東平王麗舒國公李蓋英國公世勣東光侯耿況好時候弇婁侯張昭都鄉侯承宣城侯諸葛瑾都鄉侯恪各自以功猷封父子丞相周勃子亞夫韋賢子玄成曹操子丕斛律金子光史浩子彌遠

父子太師王彞子匡史浩子彌遠月赤察兒子伽頭馬札兒台子脫脫明則張輔張懋

父子天策上將軍楚王馬殷子希範

父子狀元者獨宋梁顥及固耳本傳止言甲科考登科錄記之按遜齋閒覽梁顥八十二歲雍熙二年狀元及第其謝啓曰皓首窮經少伏生之八歲青雲得路多太公之二年容齋四筆云以國史攷之梁公雍熙二年廷試甲科景德元年以翰林學士知開封府暴卒年四十二朝野雜記謂顥登第年才二十二胡鴻臚真珠船謂宋史顥卒九十二溯其登第時乃七十三非八十二又謂雜記乃固登第之年此大可笑非宋史九字為四字之誤則扭於遜齋閒覽之說也

按雍熙二年乃太宗太平興國八年以後改號也據本傳父文度早世顥養於叔父時王禹偁舉鄉貢顥依以為學嘗以疑義質於禹偁禹偁拒之不荅顥發憤讀書不期月復有所質禹偁大稱賞之禹偁以太平八年舉進士於顥差為前輩今據閒覽真珠船所云則顥之少孤當在沙陀石晉之際而長於禹偁且四十餘年矣其不相應一也顥若果九十有二豈使之為翰林學士又使之權知開封而暴卒耶其不相應二也子固以大中祥符元年甲第僅二十三顥卒時十八耳而又有弟述及適相仁宗朝至熙寧三

十字下脫三字

年卒年七十去景德元年顯卒時僅三歲耳顯七十
五而得固九十而始得適其不相應三也顯以四十
二歲卒固以三十三歲卒於事理甚明中間顯所歷
官皆繁劇其上封事無老人意史又稱其美風姿強
力少疾於遜齋之說有毫髮類耶洪文敏在內制久
其見國史甚真與朝野雜記之言同真珠船又似夢
中說夢矣

宋諫議大夫贈太子少師陳去非長子右僕射前同
書門下平章事樞密使贈侍中謚文忠堯叟次太子
太師前同中書門下平章事贈司空侍中謚文惠堯

佐天雄節度使贈太尉謚康肅堯咨一相中書一長
樞密一為侍從俱登甲第而堯叟堯咨復第一俱建
節徽猷閣學士謚忠宣洪皓長子尚書右僕射同中
書門下平章事謚文惠迨知樞密院謚文安邁端明
殿學士謚文敏邁父子兄弟俱登制科知制誥而皓
以徽猷迨以觀文邁以資政邁以端明俱學士終二
家極為相類

參知政事太子少師謚忠獻韓億子尚書左僕射同
中書門下平章事司空贈太傅謚獻肅絳門下侍郎
太子少師維尚書右僕射中書侍郎太子太保贈司

空、續兩為宰相，兩為執政樞密使，侍中贈中書令，謚武惠。曹彬子，河陽節度使，同平章事，贈中書令，謚武懿。璨、彰，武節度使，贈侍中。璋，定國軍節度使，贈侍中。謚忠恪。琮，兩登樞宥，兩列環衛，分贈兩省之長。億，八子，彬七子，餘各有顯宦，可為文武之極致，而亦相類。○郭尚父子儀，以司徒中書令，關內、河東副元帥，河中尹，靈州大都督，單于鎮北大都護，朔方節度，關內支度，鹽池六城水運大使，押蕃部，并營田及河陽道觀察等使，汾陽王，冊拜太尉，贈太師，謚忠武。八子，顯者四：太子少保，代國公曜；太子賓客，趙國公晞；太常卿，代國公曖；金吾大將軍，祁國公曙；李西平晟亦以司徒中書令，鳳翔隴右涇原節度使，營田觀察處置等使，兼行營副元帥，西平王，冊拜太尉，贈太師，謚忠武。十三子，而顯者亦四：河中節度使，原嶺南節度使，憲，魏博節度使，平章事，涼國公勣；河中節度使，太子太保，聽，西平，功名壽考，差亞於汾陽，而四子則小勝。與汾陽埒者，大尉侍中臨淮李武穆，王光弼，功名雖盛，而晚誠有差。與西平埒者，司徒侍中北平馬莊武，王燧，功烈忠猷，皆不及也。武穆一子彙，至涇原節，莊武二子，一亦曰彙，蚤卒，一曰暢，至少府監，而其後俱

不振

唐右拾遺竇叔向有五子祭酒常司業牟中丞羣刺
史庠中丞鞏五季諫議大夫竇禹鈞有五子尚書儀
侍郎儼補闕侃叅知政事偁起居郎僖二家名位才
望俱相等今人但知有燕山而不知有補闕也

兄弟狀元自陳堯叟堯咨外有孫何孫僅制科蘇軾
轍軾入三等轍四等宋祁廷試第一兄郊第三而唱
名太后改郊第一亦可稱兄弟狀元矣

魏太尉穆崇子太尉觀尚宜陽公主觀子征東大將
軍中書監壽尚樂陵公主壽子中書監平國尚城陽

公主平國子中書監罷尚新平公主罷子尚書令司
空亮尚中山公主亮子開府中書監紹尚瑯琊公主
凡六世尚主諸昆季尚主者又十餘人七世掌機密
四為三公二代封王古所未有

三尚公主者宋彭城王劉昶仕魏至大將軍前後尚
武邑建興平陽凡三公主主三嫁駙馬者唐定安公
主初嫁殿中監王同皎次嫁衛尉少卿韋濯三嫁太
府卿崔銑齊國公主始嫁太常卿張洎次嫁裴穎三
嫁楊敷寧國公主初嫁鄭吳次嫁薛康衡三嫁迴紇
英武威遠可汗

武相元衡與李相吉甫同年生以同日拜相武以御史中丞遷門下侍郎李以中書舍人遷中書侍郎俱同中書門下平章事武出鎮西川明年李出鎮淮南久之李復入為中書相武以次年十月復入門下相李以又次年十月卒卒之日為武生日武以又次年十月殞盜其日亦李生日

秦國錢忠懿王俶生一甲子以八月二十四日生亦以八月二十四日卒又與父元瓘卒日同

宋曾丞相布以卯年卯月卯日卯時卒韓丞相絳以辰年辰月辰日辰時生韓發解南省殿試皆第三以

熙寧三月三日卒人尤異之金有田轉運時秀者所居里名半十行第五以五月五日生小名五兒年二十五應鄉府省殿四試俱第五名年五十五以八月十五日卒造物之巧如此

官名有極貴而極繁者聊志其一二唐有回天再造竭忠守正功臣太尉檢校太師中書令諸道兵馬元帥判左右神策六軍十二衛事護國宣武宣義忠武四鎮節度管內觀察處置營田等使鹽鐵度支戶部三司都制置等使解池權塩使梁王朱全忠宋有開吳鎮越崇文耀武宣德守道功臣太師尚書令兼中

書令天下兵馬大元帥鎮海鎮東軍節度管內觀察處置等使上柱國吳越國王食邑九萬七千戶實封一萬六千九百戶入朝不超劍履上殿錢俸元有元德上輔廣忠宣義正節振武佐運功臣太師開府儀同三司秦王荅剌罕中書大丞相上柱國錄軍國重事監脩國史兼徽政院侍正昭功萬戶府都總使虎符威武阿速衛親軍都指揮使司達魯花赤忠翊侍衛親軍都指揮使奎章閣大學士領學士院知經筵事太史院宣政院事也可千吟必陳千戶達魯花赤宣忠幹羅思扈衛親軍都指揮使司達魯花赤提調田田漢人司天監群牧監廣惠司內史府左都威衛使司事欽察親軍都指揮使司使宮相都總管府領大禧宗禋院兼都典制神御殿事中政院事宜鎮侍衛親軍都指揮使司達魯花赤提調宗人蒙古侍衛親軍都指揮使司提調吟刺赤也不干察兒領隆祥使司事俶藩臣也全忠伯顏權臣也秦斑列侯在丞相上漢丞相必封侯以故無列丞相上者後御史大夫亦在列侯上若唐開元以前加三公者雖不與政事係正拜官尚在宰臣之上代宗以後稍不然矣而僕射為故相其體尚尊司空不由宰

相加自王恩禮始宋時班次東宰執次使相西為親
王趙普罷相後始加晉王光義侍中班宰相上至太
平興國七年趙普復為司徒無侍中秦王廷美舊以
太師中書令班宰相上至是復居普下仁宗初曹利
用以樞密使加司空侍中欲班宰相王曾上不可神
宗初陳升之初拜平章事時文彥博以舊元相為司
空侍中無樞密使特詔居升之上固辭而止然則親
王使相雖至三師三公不敢班宰相上其三師三公
僕射不帶平章事不敢班宰相上也又唐書成用官
高者一人書名歐陽脩以宋祁先達乃分注紀志美
屬脩而列傳屬祁至於進書次序俱在祁前然考其
官則祁以殿學無侍讀龍圖二學士吏部侍郎河內
郡開國公脩以翰林龍圖二學士給事中安樂郡開
國侯官序脩本在下也蓋祁出知鄭州而脩實為學
士故耳此亦足以見宋官秩之次

舟州山人四部稿卷之一百六十六

吳郡王世貞元美著

說部

宛委餘編十一

秦始皇滅六國，寘其宮室，作之咸陽北坂上，自雍門以東至涇渭，交處殿屋，複道周閣，相屬然，各自為區，雖一瓦一甍之造，亦如其式，各書國號，不相雷同，皆布其所得諸侯美人居之，如在其國，鐘鼓帷帳不移，而具至於出狩，豐貂東至獬豸南來，又有玄旗阜旒之制，罕車之飾，寫九王之廷於咸陽北坂，車輿之綵

各樹其文所謂秦人大備而陳戰國之後車者也見秦史晉志為詳

按三輔舊事西京雜記諸書阿房宮前殿東西三里南北五里前庭中可受十萬人車行酒騎行炙千人唱萬人和一云上可以坐萬人下可以建五丈旗關內離宮三百關外四百餘漢未央宮周回二十八里前殿東西五十丈深十五丈高二十五丈有殿閣三十二至孝武以木蘭為樊棹文杏為梁柱金鋪玉戶華棖壁璫雕楹玉礪重軒鏤檻青瑣丹墀左城右平黃金為壁帶間以和氏玕玉風至其聲玲瓏然也未

央在城西偏而長樂在東太后多居之周回十九里又有桂宮比宮明光宮在北周回各十餘里孝武又建建章宮於未央宮西長安城外跨城池作飛閣通之構輦道以上下周回三十里宮正門曰闔闔高二十五丈左鳳闕高二十五丈右神明臺門內北起別風闕高五十丈對峙井幹樓高五十丈輦道相屬焉連閣皆有累罍前殿下視未央其西則廣中殿受萬人廟記云北闕門高二十五尺又有鳳皇闕高七十丈五尺又畿內千里京兆治之前乘秦嶺後越九峻東薄河華西涉岐雍內外宮一百四十五所隋文帝

遷都其正宮正殿皆名天興隋煬帝因之致美於西苑後多幸東京江都以及唐改名太極宮然俱無所增飾高宗於宮東北取苑地建太名宮其廣袤亦及五里尚未能建章之半也宋東京宮殿初因朱梁之舊建隆二年做洛陽宮殿脩之始為壯麗然周迴不過五里至晉南渡都建康朝宴所臨止東西二堂宮門之外編竹以為儲胥而已宋南渡都臨安以州治為行宮制度簡省垂拱大慶文德紫宸祥曦集英六殿隨事易名實一殿重華慈福壽康二宮重壽寧福一殿隨時異額實一宮延和崇政等四殿本一射殿天章龍圖等九閣實天章一閣大內尤庫隘階墀僅三級比於江南大家而已秦漢大駕屬車八十一乘法駕屬車三十六乘晉過江後但六乘而已天子無復六馬三乘五路皆駕四而已無復五時車有事則權以馬車代之建旗其上其後但以五色木牛象五時車豎旗於牛背行則使人輿之一何凌替也○梁孝王廣睢陽城七十里西苑方二百里作曜華宮築兔園園中有百靈山膚寸石落猿巖栖龍岫又有鴈池池間有鶴洲鳧渚其諸宮觀相連延亘數十里奇果異樹珍禽佐獸畢備王日與宮人賓客弋釣

畢下必有備

是上恐有
有字

其中是漢之諸王踰於後世人主也梁冀廣開園圃採土築山十里九坂以象二嶠深林絕澗有若自然奇禽馴獸異方珍怪畢有是漢之貴戚踰於後世人主也袁廣漢於北山下築園東西四里南北五里激流水注其中橫石為山高十餘丈連延數里養白鸚鵡紫鴛鴦犛牛青兕奇獸珍禽委積其間積沙為洲嶼激水為波濤致江鷗海鶴孕雛產鷄延漫林池奇樹異草靡不植培屋皆徘徊連屬重閣脩廊行之移晷不能徧是漢之富民踰於後世人主也中國之人長一丈者人君則黃帝堯與文王人臣則

吳伍員漢巨毋霸俱十尺毋霸腰帶十圍員眉間一尺元魏南明太守慕容吐頭長一丈圍九尺禹短一寸春秋演孔圖孔子長十尺一云九尺六寸按莊子所謂自腰以下不及禹三寸則後說似矣宋程史載有唐某者與其妹各長一丈二尺禹長九尺九寸湯九尺秦始皇八尺七寸漢高祖七尺八寸光武七尺三寸昭烈七尺五寸宋武帝七尺六寸陳武帝七尺五寸宇文周太祖八尺項王八尺二寸韓王信八尺九寸一曰八尺五寸王莽七尺五寸劉淵八尺四寸劉曜九尺四寸慕容銑七尺八寸

姚襄八尺五寸冉閔什翼健宇文泰皆八尺慕容垂
七尺四寸慕容德八尺二寸自唐以後人主長者故
少韋康成十五長八尺姜宇十五長七尺九寸劉曜
子胤十歲長七尺五寸美姿貌眉鬢如畫人固有少
而長若此者胤後止八尺四寸不能如其父也

符堅時有申香夏默護磨那俱長一丈九尺為拂蓋
郎一云一丈六尺一云一丈三尺則長之之極者然
是外國人也又大秦人長一丈五尺好騎駱駝
孔子曰人長不過一丈然至於骨節專車又孔子所
對防風氏也列子龍伯國人長三十丈洞冥記云支

提國人長三丈三尺三臂三指皆以為寓言瓊說然
防風身橫九畝自古記之鄭滿國君長狄儵如長三丈一云
五丈犯魯為叔孫得臣以戈椿喉而死其父緣斯犯宋
為皇父所殺弟焚如先犯齊為王子成父所殺簡如
走至衛復為衛所殺長狄之種遂絕然則長者僅其
君耳且以人三丈而親戰陣未有不斃於矢石者也
南海有毗騫國王長丈二頭頸三尺一名長頭王
佛長一丈六尺以為神然其小弟阿難與從弟調達
俱長一丈四尺五寸彼時天竺之長者故不少也
女子長者明德馬皇后和熙鄧皇后俱七尺三寸劉

曜劉皇后七尺八寸俱以羨著稱若今則不以爲雅矣惟劉曜長九尺四寸庶幾相稱

中國人短者蔡謨外親王蒙長三尺潁川張仲師長二尺二寸又按論衡云長一尺二寸

人之肥重者安祿山稱三百五十斤司馬保八百斤至孟業千斤極矣業嘗爲幽州督辭晉武帝稱之果得千斤

○記有廣川趙翁伯者夏月裸卧其孫兒戲以李納臍中數日有殷紅汁液滋流以爲臍燥憂而哭目盡腫久之肉盡核出乃知爲李孫所戲約也數之得七枚則其臍深不下數寸大亦稱之矣又符秦時大豪王某者錄

關疑圖字海

泯泯作泯泯
詩傳字之年

於獄其人素雄勇博碩忿而自屠其腹刃入徑寸不能破乃置刀於壁奮身觸之始透其肥重亦可推矣漢書稱韓博上言巨毋霸輶車不能載三馬不能勝即日以大車駟馬載詣關魏史拓拔猗色魁岍馬不能勝恒乘安車駕大牛牛角容一石是二人者稱之當在孟業下晉王保上○項王舉鼎拔山喑鳴叱咤千人皆廢百戰無前膽力威勇足冠千古其它若蜀五丁力士能移山舉萬鈞每王薨輒立大石長三丈爲墓志曰荊里秦鳥獲又夏育俱能舉移千鈞千鈞蓋三萬斤衛石蕃能負沙一千二百斗當爲一百二十石可謂神力矣而俱不聞有戰伐之勲泯泯以

死何也書所載魏任城王曹彰太廟新成萬斤鐘負之而趨擗白象鼻頓之於地以臂繞虎尾伏不敢動然是時海內稱關張為萬人敵不數任城也北魏盧曹長九尺餘勇力與沙門曇讚將嘗以海神脛骨為馬稍以遺齊神武諸將莫能舉惟彭樂強舉之南梁羊侃伏而作虎狀以指扶壁入三寸弓力至二十石泗州十石人各長八尺許執而對擊之俱碎又於壁直上七步橫蹋得五跡而是時海內以高敖曹配項羽不數羊盧也元鄭滂舞劍能使壯士十馬首俱墮而我明稱勇將為常開平傳穎公輩陳有張定邊凜無聞也豈有力者不必有

膽耶一萬鈞當為三十萬斤此恐記者之過

偶閱嚴氏籍沒之數臆記古之富者太史公以貧致宮刑故津津談貨殖也

以貴而富其最著者秦魏冉呂不韋楚黃歇漢霍光張安世張禹王鳳等五侯董賢梁冀董卓曹騰等魏曹洪晉石崇王愷王濟徐湛之阮佃夫梁蕭宏朱异羊侃北魏元禧元雍元琛元融李崇隋楊素唐裴寂李林甫楊國忠郭子儀韋宙裴冕元載李德裕王涯楊收吳越孫承佑蜀李昊宋蔡京梁師成韓世忠張俊楊沂中史弥遠韓侂胄賈似道元燕帖木兒伯顏朱

清張瑄其無譏者僅郭汾陽韓蘄王耳

能自力致富者陶朱公白圭猗頓巴寡婦臨邛卓王
孫程鄭宣曲任氏茂陵袁廣漢平陵士孫億東海糜
竺平邑王氏洛陽劉寶長安王元寶王酒胡鄒鳳熾
卽鄒駱駝及勝國倪瓚顧瑛沈萬三皆著在史傳其
詳

王愷作紫純布障四十里石崇乃作錦步障五十里
敵之愷恒不勝武帝助之賜以珊瑚樹高二尺許以
示石便以鐵如意擊之應手而碎君夫方惋惜以爲
疾已之寶石徐曰不足多恨今還卿乃命左右悉取

珊瑚樹有高三四尺者六七株條幹絕俗光彩耀目
如君夫比者甚衆乃恍然自失外國有進帝火浣布
者帝服以幸季倫季倫身蔽服候帝左右從奴五十
人悉衣火浣彩

秦皇爲巴寡婦築女懷清臺又令猗頓得朝見比封
君卓王孫有綠熊皮百雙漢武帝令進二十雙至唐
明皇見南山白龍問左右俱不見獨王元寶見之以
至富與至貴敵也元寶又謂明皇請以南山一樹挂
臣一縑山樹有盡臣縑無窮又黃巢亂後脩宮殿有
高兒王酒胡助錢三十萬貫後脩安國寺成上幸之

為擊十杵，施錢萬緡，羣公有擊至五杵者，一日王酒
胡乘醉入，連撞百杵，徑輦十萬緡，寘寺而去。一布衣
乃敢與人主酬酢，遂爭雄長，不減齊奴。

梁與父子，拉權垂二十年，貪聚無極，而斥賣家財，三
十餘萬萬，董賢之幸，不過三年耳，而斥賣家財，至四
十三萬萬，賢不聞納賄，蓋傾府庫以益之也。梁武帝
幸臨川王宏第，錢千萬，一庫懸一紫標，凡三十間，僅
三萬萬，而梁時錢薄小，不能三分之一。其他布絹上
綿，漆密紵蠟，朱砂雜貨，物積亦梁董之亞矣。
梁孝王薨時，餘黃金四十萬斤，吳王濞金錢布滿天

下。漢時黃金多，而王侯巨富，乃爾。昔與石而不知
卓王孫家僮千餘人，程鄭折國石崇俱八百人，袁廣
漢九百人，王氏五侯刁達楊素各數千人，高陽王雍
六千人，郭汾陽三千人，呂不韋麋竺萬人。遠田萬頃
素馬萬匹
史稱窮奢極欲者，五侯羣弟爭為奢侈，賂遺珍寶，四
面而至，羅鍾磬，舞鄭女，作倡優，狗馬大治，第舍起土
山，漸臺洞門，高廊閣道，連屬相望，郭況起高閣，以量
金玉，錯雜寶以飾臺榭，懸明珠四垂，晝視之如星，夜
望之如月，梁與大起第舍，妻孫壽亦對街為宅，殫極
土木，互相誇競，堂寢皆有陰陽，奧室連房，洞戶柱壁

雕鏤加以銅漆窗牖皆有綺疏青瑣圖以雲氣僊靈
臺閣周通更相臨望飛梁石磴陵跨水道金玉珠璣
異方珍怪充積私室遠致汗血名馬又廣開園囿採
土築山十里九坂以象二嶠深林絕澗有若自然奇
禽馴獸飛走其間冀壽共乘輦車張羽蓋飾以金銀
游觀第內多從倡伎鳴鐘吹管酣謳竟路或連繼日
夜以騁娛石崇婢美艷千餘人常擇其姿容相類者
數十人裝飾衣服大小一等調四方玉付工為倒龍
之珮紫金為鳳冠之釵結紳繞楹而舞欲有召者不
呼姓名悉聽珮聲視釵色各含異香使行而咲語則

口氣從風而颺又屑沈水香末布象牀上使所愛踐
之無跡者即賜珍珠百筐初最幸為翔風後翔風退
房幸綠珠珠弟子宋禕有國色善笛後入明帝宮中
蕭宏後庭數百千人皆極天下之選所幸江無畏器
服珍異侔於東昏番妃寶篋直千萬羊侃在衡州於
兩艤符起三間通梁水齋飾以珠玉加之錦繡盛設
帷屏列女樂垂朝解纜觀者填溢嘗宴北使陽斐賓
客三百餘人食器皆金玉雜寶奏三部女樂及夕侍
婢百餘人俱執金花燭魚弘侍妾百餘不勝金翠服
翫車馬冠絕一時有眠牀一張皆是蹙栢四面周匝

無有二異通用銀縷金花壽福兩重為脚高陽王元
雍居第匹於帝宮白壁丹楹窈窕連雲僮奴六千妓
女五百隋珠照日羅衣從風時河間王琛欲敵之造
文栢堂如徽音殿置玉井金鐘以五色絹為繩伎女
三百盡皆殊色求西域千里馬其次七百里者十餘
匹皆有名字以銀為槽金為環鎖嘗會諸王陳諸寶
器金鈺銀甕百餘口甌擊盤盒稱是餘器有水精鉢
瑪瑙琉璃盃赤玉卮數十枚工作奇妙中土所無又
陳女樂及諸名馬復引諸王案行府庫錦綉珠璣水
羅霧縠充物其內謂人曰不恨我不見石崇恨石崇

不見我楊素後庭伎妾曳綺羅者以十數第宅奢侈
僭擬宮禁有鮑亨者善屬文殷曹者工草隸竝沒為
家奴秦王楊俊為妃作七寶羃羅車不可載以馬負
之而行又為水殿香粉塗壁玉砌金階梁柱棖棟之
間周以明鏡間以寶珠極瑩飾之美與賓客伎女絃
歌其上張易之為母阿臧造七寶帳鋪象牙牀織犀
角羃貂褥蛩蟲氈汾晉龍犀臨河鳳翮為席宗楚客
造一宅皆是文栢純帖沈香和紅粉泥壁文石為階
砌安樂公主造定昆池四十九里累石為山以象華
岳引水為澗以象天津飛閣步檐斜橋磴道衣以錦

繡畫以丹青飾以金銀瑩以珠寶又為九曲蓮花臺
泉於臺湧出窮天下之壯麗揚國忠諸姨弟五家聯
亘治錦繡琢金王者大抵千人變化若神僊每帝幸
華清宮五家隊合炯若萬花川谷成錦繡遺鈿墜鳥
瑟瑟珠翠狼籍於道香聞數十里宅中沈香亭禁中
遠不逮虹霓屏風雕刻前代美人形服玩衣服皆衆
寶雜砌水精為地外以玳瑁水犀為押絡以珍珠瑟瑟
非人力所製元載芸輝堂于闐香芸潔白如玉屑
以塗壁沈檀為梁棟金銀為戶牖中設前虹霓屏風
紫綃帳輕踈而薄風不能透冬溫夏涼有龍髯紫拂
色如爛熳削水晶為柄刻紅玉為環紐所幸薛瑤英
肌體自香處金絲帳却塵褥李昌夔在荊州打獵大
脩裝具其夫人獨孤氏亦出女騎一千皆着紅繡襖
錦鞍鞞鳳靴銀鐙于頔在襄州點山燈油一上二千
石張鎡宴客牡丹會既集坐一虛堂寂無所有俄問
左右云香發未答云已發命卷簾則異香自內出郁
然滿坐羣伎以酒斝絲竹次第而至別有名伎數十
首戴牡丹衣領皆繡如其色歌昔人所作牡丹詞進
酌而退前後花與伎凡十易杯器皆如其色酒竟歌
者舞者數百人列行送客燭光霧歎歌吹雜作恍然

若僂遊

自古恩賞之重未有過於董賢楊素者賢以色素以功賢自得幸旬日間拜侍中賞賜累鉅萬封侯遂進大司馬拜女弟為昭儀位次皇后妻得通藉殿中止賢盧賞賜各千萬數父恭自少府拜衛尉賜爵關內侯妻父為將作大匠弟寬信為執金吾詔將作起第北闕下重殿洞門木土之工窮極伎巧柱檻衣以綈錦武庫禁兵尚方珍寶選物上弟盡在董氏而乘輿所服乃其副也及至東園秘器珠襦玉押皆豫以賜賢無不備具又令將作為賢起塋冢義陵旁內為便

房剛栢題湊外為微道周亘數里門闕采買甚盛揚素初破齊賜奴婢粟帛雜畜拜信州賜錢百萬錦千段馬二百匹破陳賜物萬段粟萬石加以金寶又賜陳主妹及女伎十四人破吳寇賜絲物三千段江南定賜黃金四十斤銀餅一寶以金錢縑三千段馬二百匹羊二千口公田百頃宅一區仁壽宮成賜錢百萬縑絹三千段討突厥賜物二千段黃金百斤突厥破賜縑二萬疋萬釘寶帶遷左僕射賜良馬百匹北馬二百匹奴婢百口山陵成賜物萬段田三十頃米萬石金鉢一寶以金銀鉢一寶以珠拜綾錦五百疋

賜射手賜金精盤價值鉅萬破漢王諒賜物五萬段
綺羅千足諒伎妾二十人從幸東京賜甲第一區物
二千段

漢文帝卽位大尉勃賜黃金五千斤丞相平將軍嬰
二千斤朱虛侯章襄平侯通典客揭各千斤宣帝卽
位大將軍光賜黃金七千斤錢六千萬雜繒三萬足
奴婢百七十人馬二千匹甲第一區漢世賞功之重
如此

按志云黃金方寸爲斤又云一斤卽一金也四兩爲
一斤又曰一斤十六兩愚謂漢書明有賜千金及賜

金千斤之異則一金當爲四兩而一斤爲十六兩也
按漢食貨志武帝時錢益多而輕物益少而貴乃制
白金三品其一曰重八兩環之其文龍名白撰直三
千二曰以重差小方之其文馬直五百三曰復小楮
之其文龜直三百是其時號錢輕昂銀以爲幣而八
兩直三千八錢止直三百也今錢之極重而精者世
宗朝嘉靖錢每銀一兩直錢七百尚以兩錢當漢錢
一也王莽當篡漢時造錢貨有六品契刀錯刀之類
不論而銀貨二品黃金一斤直錢萬銀八兩爲一流
朱提銀一流直錢一千五百八十他銀一流直錢一

千朱提銀出捷為至精價不可憑以他銀與黃金計之金一斤當直他銀五斤金一兩直他銀五兩也正與今不異若金四兩為斤計之則金一兩當直他銀二十兩也漢黃金錢而白金貴必不縣絕乃爾又以王莽傳言之群公奏故事聘皇后黃金二萬斤為錢二萬萬則一斤萬錢之說合矣漢賜霍光黃金七千斤當為錢七千萬也周勃黃金五千斤錢五千萬也然銀八兩而直錢一千則八錢止直一百也錢之貴三倍於武帝時矣董賢家財總錢四十三萬萬筭之在武帝時當直龍文白撰直金一千六十六萬六千

子當作于

兩在居攝時為他銀三千四百四十萬餘兩居攝正係哀帝一二年賢家錢直當以後為準後漢供南單子歲一億九十餘萬西域七千四百八十萬然則一億為一萬萬也又段熲征諸羗議以騎五千步萬人車三千兩三冬二夏費約五十四億為五十四萬萬也靈帝賣官公為錢千萬卿五百萬若以前漢錢直計之是公當出黃金五百斤卿二百五十斤是時南單于西域皆賓服而歲供一為黃金一萬九千斤一為黃金七千四百八十斤而三歲征羗之費直黃金五十四萬斤矣萬萬無此理按桓帝時貨輕而財薄

鑄漢以下六分
字義不通
宜字他本比
校者

欲改鑄大錢以劉陶言而止然則是時錢不能西漢
十之一也以後鷲眼繼環之類而錢日賤斗米一萬
則又千石而一也或輕或重莫可準則約畧言之孝
武元狩五年至平帝元始中凡一百十五年成錢二
百八十萬萬而宋神宗熙寧八年每年鑄銅鐵錢五
百四十九萬九千二百三十四貫凡貫緡皆百錢當
為五萬四千九百二十三萬四千文不四十歲而
鑄漢百十五年錢若以千錢為貫緡又當十倍蓋漢
錢精而貴其價六倍於今之上錢唐宋錢薄小而賤
什不能當今三錢一也至於黃金則漢甚多而易得

今極少然其價貴僅十分踰二耳不甚懸也每見漢
黃金以為富於後世數十倍見唐宋錢緡以為富於
漢數十倍要而言之漢實富也

郭子儀傳云每歲月俸母慮二十四萬緡一緡為百
錢則當二千四百萬錢也若一緡為千錢則十倍之
矣又每入朝上命魚朝恩元載送為主一宴至費錢
十萬緡按唐自開元二十四年六月總定一品月俸
料八千食料千八百雜用千二百防閣十五千通計
二十四千二百然則一歲俸入錢當為二十九萬四
百僅二千九百緡餘耳汾陽縱所兼十餘職皆極品

安能百倍其數耶且一宴之費為十萬緡亦當為萬餘金矣當此時天下方遭亂戶口歲入有限必不能爾抑史奪言之也

沈存中筆談考樂律改鑄渾儀求秦漢以前量度升斗計六斗當今一斗七升九合秤三斤當今十三兩一斤當今四兩三錢三分始悟所謂黃金方寸為一斤金一斤直錢一萬或二萬價相等也飲酒一石實可三斗而所謂蓋祿萬鍾辭十萬而受萬與奉黃金萬鎰賜金千斤者皆可類推矣

考功記金有六齊六分其金而錫居一謂之鍾鼎之齊五分其金而錫居一謂之斧斤之齊四分其金而錫居一謂之大刃之齊五分其金而錫居一謂之制殺之齊金錫半謂之鑿燧之齊按上金中金下金皆可和齊獨錫性柔而體易化不能相入豈記所謂錫者非今錫耶

王楙又考周禮廩人月三鬴注六斗四升曰鬴計食米日六升四合也魏李惺曰人食米月一石半是食米日五升也漢趙充國曰以一馬自他負三十日食為米二斛四斗麥八斛是人日米八升馬日麥二斗七升也匈奴傳一人三百日食用糲十八斛是人日

糲六升也。古斛小漢二斗七升，當今五升四合。所謂
人食米八升，當今二升一合六分。食米六升，當今一
升六合。觀一馬能負米麥，至此可以徵其升斗之小。
而倉公傳所載人大小腸受水米之數，不至可駭矣。
第沈存中言六斗為一斗七升九合，而楹則六斗當
為一斗六升，更少升九合，似當以存中為據。

劉威碩在蜀，車服侈靡，豔妾數十，能為聲樂，悉教誦
靈光殿賦，謝靈運門故，恒數百人。室宇華曠，盡山泉
之美，車服鮮麗，衣裳器物多改舊形。世共宗之。徐湛
之產業甚厚，宇舍園池，貴游莫及。伎樂之美，冠絕一

開開疑用
開鴻

時門生千餘，皆三吳富人子，姿質端美，衣服鮮麗，每
出入行游，塗巷盈滿。徐君擣為湘東王，諮議文冠，二
府新聲豔語，人多諷習，尤長部書，問無不對。善絃歌
好聲色，侍妾數十，皆佩金翠曳羅綺，服翫悉以金銀
開開盡日，酣飲有時，載伎肆意，游行荆楚山川，靡不
游踐。是四君者，比之王石尚為黔婁，第文士酸寒，得
此亦是生天之福。

先秦以前美人，則有少昊之皇娥，赤帝女之瓊樹，桀
之妹喜，紂之妲己，有莘氏，周穆王之盛淑人，昭王之
延娟，延娛，幽王之褒姒，楚王之息嫫，晉獻公之驪姬。

秦穆公之女弄玉。惠文之華陽夫人。莊襄王之邯鄲姬。吳王之西施。即夷光鄭旦。即脩明楚王之鄭袖。南威。陽文。李園妹。梁惠王之閭姬。趙武靈王之吳姚燕。昭王之旋娟。提謨。中山侯之陰后。江姬。皆在宮掖者。也有仍氏。青琴。毛嬙。孔父妻徐吾。犯妹。夏徵舒母。邾婁。顏夫人。皆在下者也。漢宮掖則戚夫人。高祖慎夫人。文帝陳后。阿嬌。衛后。子夫。邢夫人。尹夫人。李夫人。王夫人。鈞。七夫人。麗娟。武帝王昭君。元帝趙后。飛燕。趙婕妤。合德。成帝陰后。麗華。光武甄后。郭后。薛靈芸。即夜來莫瓊。樹。陳尚衣。陳巧笑。皆魏文帝趙夫人。潘夫人。吳王鄧夫人。吳王朝妹。

麗居洛。珍潔華。吳王二喬。孫策兩楊后。胡嬪芳。晉武股淑儀。宋孝潘妃。玉兒。東昏侯馮小憐。北齊張麗華。孔貴嬪。陳後主陳宜華。蔡容華。隋文帝朱貴兒。侯夫人。袁寶兒。吳絳仙。俱隋武惠妃。楊太真。唐玄宗王才人。武兩周后。李後主兩劉妃。宋徽宗閨閣。則秦羅敷。顧夫人。張玄江無畏。臨川王曹洪。女倩。婦李勢。女桓。溫。樂昌公主。徐德無雙客。王仙。失行。則卓文君。鶯鶯。非烟。虢國夫人。狄夫人。達奚盈盈。姬侍。則馮方。女術。袁絳樹。魏。翔風。綠珠。宋。禕。石。張靜琬。孫荆玉。羊侃徐月華。脩容。豔姿。元雍雪兒。李阿。劉鑿。紅拂。靖紅。綃。崔。薛。瑤。英。戴。寵。姐。寧王紫雲。李女。

寶李愿解愁潘名伎則霍小玉李娃楚娘夜來杜韋娘
史鳳楚蓮香劉採春皆灼灼有名者若退之之桃柳
樂天之蠻素雖見詞章酸士所獲寧堪上駟哉

晉人重容觀以故負美貌能清言即雍容至顯位然
所推重無如衛洗馬叔寶如所云少時乘羊車出市
觀者傾洛城曰誰家玉人後渡江至建康年二十七
矣尚為人看殺其次則杜弘治右軍目之曰膚若凝
脂眼如點漆此神仙中人也人以此叔寶則曰那得
比其中尚容數人又曰衛玠神清社又膚清一時品
藻若此至於何晏裴楷王衍潘岳王濛之徒皆以美

貌聞豈一時好尚之至造物亦遂移鄉耶

向雕彌子瑕安陵龍陽鄧通董賢林仁遇以色進外
張昌宗張易之以色進內俱至卿相貴富者也

太康以後人顯外色至多怨女五行占以為災漢哀
幾於禪位符主竟成敵國李龍為之殺妻僧達遂將
阮姪又有楚國王仲先聞潘章之美因願為友遂同
衾枕篤於伉儷未幾偕沒其家憫之葬於羅浮山忽
生一樹柯條枝葉無不相抱時人號曰枕樹更為
異矣

晉獻公欲伐郭而憚舟之僑存荀息曰周書有言天

郭作親

郭當作鏡

女破舌乃遺之女樂以亂其政舟之僣諫而不聽遂
去因而伐郭遂破之又欲伐虞而憚宮之奇存苟息
曰周書有言美男破老乃遺之美男教之惡宮之奇
宮之奇以諫而不聽遂亡因而伐虞遂取之然則虞
鏡之君一好內一好外也

是編文政三年端月念七購得坊實尚古堂披
閱之際加點以便宜家兒等 曲古字主人

